

四庫全書

史部

欽定四庫全書

欽定續通志卷一百二

天文畧六

刻漏

昔黃帝創觀漏水制器取則以分晝夜其後因以命官  
周禮挈壺氏則其職也其法總以百刻分於晝夜冬至  
晝漏四十刻夜漏六十刻夏至晝漏六十刻夜漏四十  
刻春秋二分晝夜各五十刻日未出前二刻半而明既

沒後二刻半乃昏減夜五刻以益晝漏謂之昏旦漏刻  
皆隨氣增損冬夏二至之間晝夜長短凡差二十刻每  
差一刻為一箭冬至互起其首凡有四十一箭晝有朝

有禺有中有晡有夕夜有甲乙丙丁戊

按周官司籛氏掌夜時鄭注夜

時謂夜晚早若今甲乙至戊賈公彥疏云甲乙則早時  
戌亥則晚時非也鄭自以甲乙丙丁戌五分夜為定或  
訛戌為戌賈疏遂承其訛而言戌亥耳顏氏家訓云漢  
魏以來謂為甲夜乙夜丙夜丁夜戌夜亦云一更二更  
三更四更五更

更是其証也

昏旦有星中每箭各有其數皆所以分時

代守更其作役漢興張蒼因循古制猶多疎闊及孝武

考定星術下漏以追天度亦未能盡其理劉向洪範傳  
記武帝時所用法云冬夏二至之間一百八十餘日晝  
夜差二十刻大率二至之後九日而增損一刻焉至哀  
帝時又改用晝夜一百二十刻尋亦寢廢至王莽竊位  
又遵行之光武之初亦以百刻九日加減法編於甲令  
為常符漏品至和帝永元十四年霍融上言官術率九  
日增減一刻不與天相應或時差至二刻半不如夏術  
漏刻隨日南北為長短乃詔用夏術漏刻依日行黃道

去極每差二度四分為增減一刻凡用四十八箭終於  
魏晉相傳不改宋何承天以月蝕所在當日之衡考驗  
日宿知移舊六度冬至之日其影極長測量晷度知冬  
至移舊四日前代諸漏春分晝長秋分晝短差過半刻  
皆由氣日不正所以而然遂議造漏法春秋二分昏旦  
晝夜漏各五十五刻齊及梁初因循不改至天監六年  
武帝以晝夜百刻分配十二辰辰得八刻仍有餘分乃  
以晝夜為九十六刻一辰有全刻八焉至大同十年又

改用一百八刻依尚書考靈曜晝夜三十六頃之數

按周

髡算經趙君卿注引考靈曜曰分周天為三十六頭頭有十度九十六分度之十四長日分於寅行二十四頭入於戌行十二頭短日分於辰行十二頭入於申行二十四頭此之謂也又考李籍周髡音義全錄趙注亦作三十六頭隋志云三

因而三之冬至晝漏四十八刻夜

漏六十刻夏至晝漏七十刻夜漏三十八刻春秋二分

晝漏六十刻夜漏四十八刻昏旦之數各三刻先令祖

暉之為漏經皆依渾天黃道日行去極遠近為用箭日

率陳文帝天嘉中亦命舍人朱史造漏依古百刻為法

周齊因循魏漏晉宋梁大同並於百刻分於晝夜隋初用周朝尹公正馬顯所造漏經至開皇十四年邳州司馬袁充上晷影漏刻充以短影平儀均布十二辰立表隨日影所指辰刻以驗漏水之節十二辰刻互有多少時正前後刻亦不同袁充素不曉渾天黃道去極之數苟役私智變改舊章其於施用未為精密開皇十七年張胄元用後魏渾天鐵儀測知春秋二分日出卯酉之北不正當中與何承天所測頗同皆日出卯三刻五十

五分八酉四刻二十五分晝漏五十刻一十分夜漏四十九刻四十分晝夜差六十分刻之四十仁壽四年劉焯上皇極術有日行遲疾推二十四氣皆有盈縮定曰春秋分定日去冬至各八十八日有奇去夏至各九十三日有奇二分定日晝夜各五十刻又依渾天黃道驗知冬至夜漏五十九刻一百分刻之八十六晝漏四十分刻一十四分夏至晝漏五十九刻八十六分夜漏四十分刻一十四分冬夏二至之間晝夜差一十九刻一百分



刻之七十二胄元及焯漏刻並不施用然其法制皆著  
在算術推驗加時最為詳審大業初耿詢作古歌器以  
漏水注之獻於煬帝帝善之因令與宇文愷依後魏道  
士李蘭所修道家上法稱漏制造稱水漏器以充行從  
又作候影分箭上水方器置於東都乾陽殿前鼓下司  
辰又作馬上漏刻以從行辨時刻唐大衍術晷漏中星  
晷例曰日行有南北晷漏有長短然二十四氣晷差徐  
疾不同者句股使然也直規中則差遲與句股數齊則

差疾

按一行此論即升度時差之法其所謂規中即過二極二至經圈也蓋黃道與赤道斜交二分以後

黃道如弦赤道如股故黃道一度赤道一度不足赤道之度既少則時刻加矣二至以腰圍大圈之度當赤道距等小圈之度故黃道一度赤道一度隨辰極高下所遇度有餘赤道之度既多則時刻減矣

不同如黃道刻漏此乃數之淺者近代且猶未曉今推黃道去極與晷景漏刻昏距中星四術反覆相求消息率旋相為中以合九服之實其步軌漏術又統千五百二十象積四百八十辰八刻百六十分昏明二刻二百四十分各置其氣消息裒依定氣所有日每以陟降率

陟減降加其分滿百從衰各得每日消息定衰其距二分前後各一氣之外陟降不等皆以三日為限各置初日陟降率依限次損益之為每日率乃遞以陟減降加氣初消息衰各得定衰其陟降率消息衰具詳本術南方戴日之下正中無晷自戴日之北一度乃初數自此起差每度增之為每度差因累其差以遞加初數滿百為分分十為寸各為每度晷差又累其晷差得戴日之北每度晷數又各置其氣去極度以極去戴日度減之

得戴日之北度數各以消息定衰得每日晷差及每日  
中晷常數又加減之得每日中晷定數置消息定衰滿  
象積為刻不滿為分各遞以息減消加其氣初夜半漏  
得每日夜半漏定數其全刻以九千一百二十乘之十  
九乘刻分從之如三百而一為晨初餘數各倍夜半漏  
為夜刻以減百刻餘為晝刻減晝五刻以加夜即晝為  
見刻夜為沒刻半沒刻加半辰起子初算外得日出辰  
刻以見刻加而命之得日入宋初復挈壺之職專司辰

刻署於文德殿門內之東偏設鐘樓鼓樓於殿庭之左  
右其制有銅壺水稱渴烏漏箭時牌契之屬壺以貯水

烏以引注稱以平其漏箭以職其刻牌以告時於晝

牌有

七自卯至酉用之  
制以牙刻字填金

契以發鼓於夜

契有二一曰放鼓二  
曰止鼓制以木刻字

於常以卯正後一刻為禁門開鑰之節盈八刻後以為

辰時每時皆然以至於酉每一時直宮進牌奏時正雞

人引唱擊鼓一十五聲

惟午正擊鼓  
一百五十聲

至昏夜雞唱放鼓

契出發鼓擊鐘一百聲然後下漏每夜分為五更更分

為五點更以擊鼓為節點以擊鐘為節每更初皆雞唱

轉點即移水稱以至五更二點止鼓契出

凡放鼓契出禁門外擊鼓

然後衙鼓作止鼓契出亦然而更鼓止焉

五點擊鐘一百聲雞唱擊鼓是謂

撥點至八刻後為卯時正四時皆用此法大中祥符三

年春官正韓顯符上銅渾儀法要其中有二十四氣晝

夜進退日出沒刻數立成之法熙寧七年沈括上浮漏

議曰播水之壺三而受水之壺一曰求壺廢壺

按廢壺玉海作

度壺據後文云枝渠之委所謂廢壺也以受廢水則玉海作度為誤

方中皆圓尺有八寸

尺有四寸五分以深其食二斛為積分四百六十六萬  
六千四百六十曰複壺如求壺之度中離以為二元一

斛介八斗

按元字下疑有訛誤

而中有達曰建壺方尺植三尺有

五寸其食斛有半求壺之水複壺之所求也壺盈則水

馳壺虛則水凝複壺之脇為枝渠以為水節求壺進水

暴則流怒以搖複以壺又折以為介複為枝渠達其溢

溢枝渠之委所謂廢壺也以受廢水三壺皆所以播水

為水制也自複壺之介以玉權醴於建壺建壺所以受

水為刻者也建壺一易箭則發上室以瀉之求複建壺  
之泄皆欲追下水所趣也玉權下水之槩寸矯而上之  
然後發則水撓而不躁也複壺之達半求壺之注玉權  
半複壺之達枝渠博皆分高如其博平方如砥以為水  
槩壺皆為之冪無使穢遊則水道不慧求壺之冪龍紐  
以其出水不窮也複壺士紐士所以生法者複壺制法  
之器也廢壺鯢紐止水之藩鯢所伏也銅史令刻執漏  
政也冬設煇燎以澤凝也注水以龍喙直頸附於壺體



直則易浚附於壺體則難敗複壺玉為之喙銜於龍嘴  
謂之權所以權其盈虛也建壺之執室旒塗而彌之以  
重帛室則不吐也管之善利者水所浚也非玉則不能  
堅良以久權之所出高則源輕源輕則其委不悍而浚  
物不利箭不效於璣衡則易權洗箭而改畫覆以璣衡  
謂之常不弊之術今之下漏者始嘗甚密久復先大者  
管泐也管泐而器皆弊者無權也弊而不可復壽者術  
固也察日之晷以璣衡而制箭以日之晷跡一刻之度

以賦餘刻刻有不均者建壺有膏也贅者磨之創者補之百刻一度其壺乃善晝夜已復而箭有餘才者權鄙也晝夜未復而壺吐者權沃也如是則調其權比制器之法也下漏必用甘泉惡其逆之為壺膏也必用一源泉之冽者權之而重重則敏於行而為箭之情慄泉之鹵者權之而輕輕則椎於行而為箭之情駕一井不可他汲數汲則泉濁陳水不可再注再注則行利此下漏之法也箭如建壺之長廣寸有五分三分去二以為之厚

其陽為百刻為十二辰博牘二十有一如箭之長廣五分去半以為之厚陽為五更為二十有五籌陰刻消長之裛三分箭之廣其中刻契以容牘夜算差一刻則因箭而易牘鏹匏箭舟也其虛五升重一鎰有半鍛而赤柔者金之美者也然後清而不墨墨者其久必蝕銀之有銅則墨銅之有錫則屑特銅久濡則腹敗而飲皆工之所不材也淳熙十四年國學進士會稽石萬言淳熙術立元非是氣朔多差不與天合南渡以來渾儀草

創不合制度無圭表以測日景長短無機漏以定交食  
加時設欲考正其差而太史局官尚如去年測驗太陰  
虧食自一更一點還光一分之後或一點還光二分或  
一點還光三分以上或一點還光三分以下使更點乍  
疾乍徐隨影走弄以肆欺蔽然其差謬非獨此耳冬至  
日行極南黃道出赤道二十四度晝極短故四十刻夜  
極長故六十刻夏至日行極北黃道入赤道二十四度  
晝極長故六十刻夜極短故四十刻春秋二分黃赤二

道平而晝夜等故各五十刻此地中古今不易之法至王普重定刻漏又有南北分野冬夏晝夜長短三刻之差今淳熙術皆不然冬至晝四十刻極短夜六十刻極長乃在大雪前二日所差一氣以上自冬至之後晝當漸長夜當漸短今過小寒晝猶四十刻夜猶六十刻所差七日有餘夏至晝六十刻極長夜四十刻極短乃在芒種前一日所差亦一氣以上自夏至之後晝當漸短夜當漸長今過小暑晝猶六十刻夜猶四十刻所差亦

七日有餘及晝夜各五十刻又不在春分秋分之下至於日之出入人視之以為晝夜其長短有漸不可得而急與遲也今日之出入增減一刻近或五日遠或三四十日而一急一遲與日行常度無一合者請考正淳熙法之差俾之上不違於天時下不乖於人事送秘書省禮部詳之明崇禎二年禮部侍郎徐光啓兼理算法請造象限大儀六紀限大儀三平懸渾儀三交食儀一列宿經緯天球一萬國經緯地球一平面日晷三轉盤星

晷三候時鐘三望遠鏡三報允已又言定時之法當議者五事一曰壺漏二曰指南鍼三曰表杲四曰儀五曰晷漏壺水有新舊滑濇則遲疾異漏管有時塞時磷則緩急異正漏之初必於正午初刻此刻一誤靡所不誤故壺漏特以濟晨昏陰晦儀晷表杲所不及而非定時之本指南鍼術人用以定南北辨方正位咸取則焉然鍼非指正子午曩云多偏丙午之間以法考之各地不同在京師則偏東五度四十分若憑以追晷冬至午正

先天一刻四十四分有奇夏至午正先天五十一分有奇若表臬者即考工匠人置槃之法識日出入之影參諸日中之影以正方位今法置小表於地平午正前後累測日影以求相等之兩長影為東西因得中間最短之影為正子午其術甚簡儀者本臺故有立運儀測驗七政高度臣用以較定子午於午前屢測太陽高度因最高之度即得最短之影是為南北正線既定子午卯酉之正線因以法分布時刻加入節氣諸線即成平面



日晷又今所用員石歌晷是為赤道晷亦用所得正子  
午線較定此二晷皆可得天之正時刻所為晝測日也  
若測星之晷實周禮夜考極星之法古時北極星正當  
不動之處今時久漸移已去不動處三度有奇舊法不  
可復用故用重盤星晷上書時刻下書節氣仰測近極  
二星即得時刻所謂夜測星也七年督修算法右參政  
李天經言輔臣光啓言定時之法古有壺漏近有輪鐘  
二者皆由人力遷就不如求端於日星以天合天乃為

本法特請製日晷星晷望遠鏡三器臣奉命接管敢先  
言其略日晷者磐石為平面界節氣十三線內冬夏二  
至各一線其餘日行相等之節氣皆兩節氣同一線也  
平面之周列時刻線以各節氣太陽出入為限又依京  
師北極出地度範為三角銅表置其中表體之全影指  
時刻表中之銳影指節氣此日晷之大畧也星晷者治  
銅為柱上安重盤內盤鐫周天度數列十二宮以分節  
氣外盤鐫列時刻中橫刻一縫用以窺星法將外盤子

正初刻移對內盤節氣乃轉移銅盤北望帝星與勾陳大星使兩星同見縫中即視盤面銳表所指為正時刻此星晷之大畧也若夫望遠鏡亦名窺筭其製虛管層疊相套使可伸縮兩端俱用玻璃隨所視物之遠近以為長短不但可以窺天象且能攝數里外物如在目前至於日晷星晷皆用措置得宜必須築臺以便安放天經又請造沙漏明初詹希元以水漏至嚴寒水凍輒不能行故以沙代水然沙行太疾未協天運乃於斗輪之

外復加四輪輪皆三十六齒厥後周述學病其竅太小而沙易堙乃更制為六輪其五輪悉三十齒而微裕其竅運行始與晷協天經所請殆其遺意歟新法算書太陽在地平上人目可得而覩謂之晝太陽漸隱地平之下人目無見則謂之夜是晝夜者全由人居以分隨方極出地隨時太陽躔某宮其晝夜刻分皆可依法推算焉然若干而法算與目見恒異蓋太陽體大算法皆以體心出地為晝始而人目以一見日輪即為晝始又日出沒升降

度有斜正不同又地平各曜出没之界受清蒙氣有變  
凡此皆非人目能辨故術家立有視差法也一晝一夜  
平分為十二時共刻九十有六此恒率也其晝夜永短  
遞遷之故則不但日行南陸北陸不同而已亦由北極  
出地高卑互異而永短因焉如赤道正過天頂之地兩  
極合於地平平行其晝夜亦均停絕無永短又極在天  
頂赤道與地平平行其下晝夜亦無長短之較但太陽  
百八十日恒見百八十日恒隱耳此外諸方各有永短

顧其一歲之中晝夜均停者四日握算者引而伸之據四日之一日逐漸加減因得九十日之晝夜長短隨可以推終歲之數也晨昏者分晝分夜之二界也太陽將出未出數刻之前其光東發星光漸為所奪是名為晨太陽已入迴光返照亦經數刻始遁然滅盡是名為昏其久暫分數亦因冬夏而分短長新法以日在地下十八度內為晨昏之限但太陽行此十八度又各方各宮不等因有五刻七刻十刻之別若論極高七十二度以

上之地則夏月晨昏相切雖至丙夜無甚黯黑也

臣等謹按晝夜永短以日出入之早晚而分而早晚之故有二一由於日行之內外一由於人居之南北蓋日行黃道與赤道斜交春秋分日行正當交點與地平交於卯酉地平上下之度相等故晝夜適均春分以後日行赤道內至夏至而極其距等圈與地平交於寅戌地平上下之度上多下少故晝長夜短秋分以後日行赤道外至冬至而極

其距等圈與地平交於辰申地平上下之度上少下多故晝短夜長二分前後距交不遠黃道勢斜則緯行疾故數日而差一刻二至前後黃道勢平則緯行遲故半月而差一刻此由日行之內外而生者至於人居有南北則北極出地有高下於是見日之出入早晚隨地不同中國在赤道北北極出地上南極入地下故夏晝長冬晝短所居之地愈北北極愈高則永短之差愈多至於北極之下



則赤道當地平夏則有晝而無夜冬則有夜而無晝蓋以半年為晝半年為夜矣所居之地愈南北極漸低則永短之差漸少至於赤道之下則北極當地平而晝夜常均並無永短蓋一歲為四時者各二矣赤道以南與北相反此由人居之南北而生者也攷之古術周髀算經曰冬至晝極短日出辰而入申陽照三不覆九東西相當正南方夏至晝極長日出寅而入戌陽照九不覆三東西相當

正北方日出左而入右南北行故冬至從坎陽在  
子日出巽而入坤見日光少故曰寒夏至從離陰  
在午日出艮而入乾見日光多故曰暑大衍術曰  
二十四氣晷差徐疾不同由句股使然也直規中  
則差遲與句股數齊則差疾皆言日行之內外也  
周髀算經言七衡曰北極之下不生萬物北極左  
右夏有不釋之冰中衡左右冬有不死之草五穀  
一歲再熟凡北極之左右物有朝生暮獲趙君卿

云北極之下從春分至秋分為晝從秋分至春分  
為夜此即以地緯度分寒暖五帶晝夜永短各處  
不同之法又唐宋志所載各家步晷漏之陽城術  
其陟降加減之衰亦皆言人居之南北也

臣等又按孔穎達尚書正義馬融云古制刻漏晝  
夜百刻晝長六十刻夜短四十刻晝短四十刻夜  
長六十刻融之此言據日出見為說天之晝夜以  
日出入為分人之晝夜以昏明為限日未出前二

刻半為明日入後二刻半為昏損夜五刻以裨於  
晝則晝多於夜復校五刻古今算術所候皆云夏  
至之晝六十五刻夜三十五刻冬至之晝四十五  
刻夜五十五刻春分秋分之晝五十五刻夜四十  
五刻此其不易之法也然今太史細候之法則校  
常法半刻也從春分至於夏至晝漸長增九刻半  
夏至至於秋分所減亦如之又於每氣之間增減  
刻數有多有少不可通而為率漢初未能審知率

九日增減一刻和帝時待詔霍融始請改之鄭注  
書緯考靈曜仍云九日增減一刻猶尚未覺誤也  
鄭注此云日長者日見之漏五十五刻日短者日  
見之漏四十五刻與算不同故王肅難云知日見  
之漏減晝漏五刻不意馬融為傳已減之矣因馬  
融所減而又減之故日長為五十五刻因以冬至  
反之取其夏至夜刻以為冬至晝短此其所以誤  
耳此所云昏明之限即朦影限也太陽未出之前

已入之後距地平一十八度皆有光故以十八度  
為朦影限然其時刻則隨時隨地不同其隨時不  
同者天度使然也差十八度此大圈之度也赤道  
亦為大圈其度濶自赤道而南北皆距等圈其度  
狹近二分者以濶度當濶度故刻分少近二至者  
以狹度當濶度故刻分多也隨地不同者地南則  
赤道距天頂近太陽正升正降其度徑地北距天  
頂遠太陽斜升斜降其度紆故愈北則朦影之刻

分愈多愈南則朦影之刻分愈少也若北極出地  
四十八度半以上則夏至之夜半猶有光愈北則  
愈不夜矣南至赤道下則二分之刻分極少而二  
至之刻分相等赤道以南反是

臣等又按古今漏法之刻分多寡不一皆可以便  
於算也術家有大刻有小刻初一初二初三初四  
正一正二正三正四謂之大刻合一日計之得九  
十六刻其不盡者置一初初於初一之上置一正

初於正一之上謂之小刻每刻正當大刻六分之一合一日計之為初初者十二為正初者十二又得四大刻合前為百刻宋王達蠡海集言百刻之說每刻為六十分百刻共得六千分散於十二時每時得五百分如此則一時占八刻零二十分將八刻截作初正各四刻却將二十分零數分作初初正初微刻各一十分也周禮挈壺氏注漏箭晝夜共百刻禮記樂記百度得數而有常注百度百



刻也靈樞經漏水下百刻以分晝夜說文漏以銅  
受水刻節晝夜百刻五代史馬重績傳重績言漏  
刻之法以中星考晝夜為一百刻八刻六十分刻  
之二十為一時時以四刻十分為正此自古所用也  
今失其傳以午正為時始下侵未四刻十分而為  
午由是晝夜昏曉皆失其正請依古改正從之玉  
海每時初行一刻至四刻六分之一為時正終八  
刻六分之一則交入次時蓋古制法晝夜共百刻

每刻六分之為六小刻每小刻又十分之故晝夜  
六千刻每刻六十分也其散於十二辰每一辰四  
大刻二小刻共得五百分漢建平中改百刻為百  
二十刻若不改分則五十分為一刻十刻為一辰  
也梁天監中改用整刻九十六若不改分則每刻  
得六十二分有半二法皆不若古用八大刻二小  
刻之密回回晝夜刻法亦用整刻九十六分每一  
辰八整刻而以四刻為一小時猶夫古法之有初

初初一初二初三初四正初正一正二正三正四  
也每小時六十分猶夫古法每刻六十分之意而  
變用之也其法度有初度有一度蓋亦猶夫古  
法有初初初正初正一也周天用三百六十度亦  
猶晝夜三十六頃之說也

欽定續通志卷一百二

欽定四庫全書

史部

欽定續通志卷一百

三至九

主事臣尹壯圖覆勘

總校官原任侍講臣王燕緒

欽定四庫全書

欽定續通志卷一百三

地理畧一

臣等謹案鄭樵作通志地理畧首列水道自序云  
郡縣碁布州道瓜分皆由水以別故禹貢為萬世  
不易之書苟明乎此則天下可運於掌其意甚善  
次歷代對畛叙自黃虞訖於隋季次唐開元十道  
圖皆載某道領若干州州所領之縣則不著錄凡

以云畧也然其載水道雜採漢書地理志水經注  
杜佑通典之文摭拾成篇別無義例如畧中先載  
湔若諸水並不詳其源流又不依禹貢次序編輯  
貢賦戶口本書自有食貨專門於此不必登載今  
所續纂仍以水道冠之一本禹貢之九州為序而  
以水經注所載各水加案附識至若黃河大江濟  
水俱經

御製詩文睿訂詳核當恭載於

皇朝地畧中此不復叙云

水道

衡漳

漳水橫流至河故曰橫漳衡古橫字也漳水有二異源而下流相合水經注濁漳水出上黨長子縣西發鳩山清漳水出上黨沾縣西北少山大黽谷濁漳水自長子縣東逕屯留縣南又東逕壺關縣北又東北逕潞縣北又東逕武安縣清漳水自涉縣東南來注

之謂之交漳口又東逕鄴縣武城平陽斥邱即裴列人肥鄉斥漳諸縣杜佑通典謂漳水至肥鄉乃歸於河

恒衛

恒水出曲陽縣恒陽溪東流注於漣水而與漣合流衛水出靈壽縣雷溝河南流至縣東南與滹沱合流水經注漣水出代郡西北高氏山即溫夷之水東合溫泉水東逕靈邱廣昌諸縣至曲陽縣北恒水西來



注之又東逕唐縣安喜安國諸縣又東北逕博陵侯  
世阿陵諸縣又東北至長城注於易水元和志漚沱  
水出代州繁峙縣泰戲山西南流經唐林秀容諸縣  
東經定襄五臺諸縣至靈壽縣西南衛水來會遂合  
流東南逕真定九門鼓城深澤無極饒陽諸縣至瀛  
莫二州然漚沱自宋時築邊州塘灤河之故道已改

泒水

按禹貢泒水在導河節以其在  
冀州故叙於衛漳恒衛之後

泒水發源屯留下亂漳津卽與清濁二漳合流

臣等謹按衡漳恒衡洚水皆禹貢所載冀州之水也冀州為古帝都以今輿地言之則直隸之順天永平保定廣平順德五府及真定河間二府之西北境并宣化府以外訖於大遼水山西之太原平陽汾州潞安大同澤州六府遼沁二州河南之懷慶衛輝彰德三府皆古冀州之域後以其地廣大故分置幽并二州

臣等又按冀州之水禹貢所未及載者水經注汾

水出太原汾陽縣北管涔山經太原汾州平陽諸  
府以歸於河沁水出謁戾山清水出黑山淇水出  
大號山蕩水出蕩陰縣洹水出上黨泫氏縣皆與  
衡漳合流澮水出河東絳縣注於汾水涑水出泰  
葭谷文水出大陵縣原公水出茲氏縣洞渦水出  
沾縣晉水出晉陽縣皆會於汾湛水出軹縣歸於  
河易水出故安縣經東州歸於海聖水出上谷東  
過安次縣歸於海巨馬水卽涑水出代郡廣昌縣

經平舒縣歸於海濕水出雁門濕餘水出上谷歸於沽  
河濡水從塞外來經海陽縣歸於海大遼水出白  
平山過安市縣西南歸於海以今輿地言之諸水  
皆在山西直隸之境即古冀州域也

九河

爾雅九河曰徒駭太史馬頰覆釜胡蘇簡絮鈎盤鬲  
津故道多湮漢唐諸儒皆指燕齊之間一二故道以  
實之大約謂徒駭最北鬲津最南

雷夏

雷夏澤名水之所鐘為澤水經注雷澤在大成陽故城西北史記稱舜漁於雷澤就食於負夏意是時雷澤負夏皆澤所彌漫故總名雷夏

灘沮

灘沮二水名元和志灘沮俱出濮州雷澤縣西北平地

漂

水經注漂水出東武陽經高唐而注於海

臣等謹按九河雷夏灘沮漂皆禹貢所載兗州之水也兗州東南據濟西北距河以今輿地言之則河南衛輝府之北境直隸之大名府及真定河間二府之東南境山東之東昌兗州府及濟南青州二府之西北境

臣等又按兗州之水禹貢所未及載者水經注甄子河故瀆自句陽縣西東逕雷澤北東北過廩邱

為濮水芹溝水出臺縣東南西北注於濟水灤水  
出歷縣故城西南北流注於濟以今輿地言之則  
濟南兗州二府之地皆古兗州域也

### 濰淄

水經注濰水出瑯琊箕縣濰山東北逕東武都昌諸  
縣故城東入於海淄水出萊蕪縣原山東北至皮邱  
沈入於海

### 汶

水經注汶水出萊蕪縣原山西南注於濟

臣等謹按濰淄汶皆禹貢所載青州之水也青州東北至海西南距岱以今輿地言之則山東之登州萊州青州濟南諸府泰安府兗州府之北境其東南跨海為

盛京奉天府訖於朝鮮國也

臣等又按青州之水禹貢所未及載者水經注巨洋水出朱虛縣泰山東北注於海沫水出瑯琊大



弁山注於沂水以今輿地言之則青州府之益都縣沂州府之沂水縣地皆古青州域也

淮

水經注淮水出平氏縣胎簪山東北過期思諸縣又東過當塗諸縣至廣陵淮浦注於海

沂

漢書地理志沂水出蓋縣艾山水經注沂水出沂山水有二源南源世謂之柞泉屯水所發俗謂之魚窮

山俱東南流合成一川故漢志與水經異也東南逕  
下邳諸縣注於泗

大野

大野澤名周禮職方氏兗州澤藪曰大野按大野在  
徐之西兗之東周無徐州故以屬兗元和志大野澤  
在鉅野縣東五里南北三百里東西百餘里

泗

水經注泗水出魯卞縣故城東南桃墟西北西南逕

魯城小沛諸縣又東南逕彭城下邳諸縣又東逕魏陽城北流注於淮

臣等謹按淮沂大野泗皆禹貢所載徐州之水也徐州東至海北至岱南及淮以今輿地言之則江南徐州府之邳州宿遷睢寧及鳳陽府之懷遠宿州靈璧泗州之五河淮安府之桃源清河安東海州之贛榆山東之兗州府則滋陽曲阜寧陽鄒縣泗水滕縣嶧縣金鄉之南境濟寧州則魚臺嘉祥

汶上之南境沂州府則郯城蒙陰沂水莒州日照  
之南境泰安府則東平平陰新泰萊蕪之南境青  
州府則諸城之南境也

彭蠡

彭蠡澤名後稱彭蠡湖水經注贛水總納十川注於  
彭蠡是也漢書地理志豫章郡贛縣有豫章水雩都  
縣有湖漢水鄱陽縣有鄱水餘汗縣有餘水艾縣有  
修水南城縣有盱水建城縣有蜀水宜春縣有南水

南埜縣有彭水又長沙國安成縣有廬水皆注於湖  
即總納十川之水也

三江

鄭康成書注左合漢為北江右會彭蠡為南江岷江  
居其中為中江三江俱會彭蠡合為一江注海

震澤

震澤澤名一名具區周禮職方氏揚州澤藪曰具區  
漢書地理志會稽吳縣具區在西古文以為震澤

臣等謹按彭蠡三江震澤皆禹貢所載揚州之水也揚州北據淮南距海以今輿地言之浙江江西福建皆是江南則江寧揚州廬州安慶池州太平寧國徽州鎮江常州蘇州松江十二府滁和廣德三州其鳳陽府則鳳陽定遠壽州潁州府則霍邱泗州則盱眙天長淮安府則山陽鹽城河南則光州之光山固始湖北則黃州府之羅田蘄水蘄州廣濟黃梅廣東則潮州府也

臣等又按揚州之水禹貢所未載其水經注與漢書地理志異者水經注載新淦縣有牽水淦水南昌縣有濁水僚水彭澤縣有循水皆注於彭蠡之水也廬江水出廬山北過彭澤縣注於江漸江水出黟縣北過餘杭注於海以今輿地言之在江西浙江地皆古揚州域也

漢

杜佑通典秦州上邽縣嶓冢山西漢水所出經嘉陵

曰嘉陵江經閬中曰閬江漢中金牛縣嶓冢山禹導  
漾水東流為漢亦曰沔水

九江

九江即洞庭因九水所合故名九江

雲夢

雲夢澤名周禮職方氏荊州澤數曰雲夢漢書地理

志南郡華容縣雲夢澤在南

滄浪

按禹貢滄浪在導漾節以其地在荊州  
故叙於雲夢之後又按史記滄作蒼



滄浪即漢水蔡傳集注武當縣北四十里漢水中有  
洲曰滄浪洲水曰滄浪水

臣等謹按漢九江雲夢滄浪皆禹貢所載荊州之  
水也荊州北據荆山南及衡山之陽以今輿地言  
之湖廣武昌漢陽安陸荊州岳州長沙衡州常德  
辰州寶慶永州施南十二府郴靖二州襄陽府之  
南漳縣德安府之安陸雲夢應城應山及隨州之  
南境黃州府之黃岡麻城黃安四州夔州府之東

境廣西則桂林府之全州是也

臣等又按荊州之水禹貢所未載者水經注湘水出零陵始安縣陽海山東北流注長沙會資沅澧四水同注洞庭夷水出巴郡魚復縣東注於江以今輿地言之在長沙岳州之界古荊州域也

伊洛渥澗

水經注伊水出南陽縣西蔓渠山東北注於洛洛水出京兆上洛縣謹舉山東北注於河渥水出河南穀

城縣北山東與千金渠合又東注於洛澗水出新安縣南白石山東南注於洛

滎波

滎波澤名即漢滎陽縣地

荷水

經典釋文荷水出山陽胡陵水經注荷水過湖陸縣

南東注於泗

孟豬爾雅作孟諸

孟諸澤名元和志孟諸澤在虞城縣西北十里周迴五十里

臣等謹按伊洛澗滎波荷孟諸皆禹貢所載豫州之水也豫州西南至荆山北距河水以今輿地言之河南則河南開封歸德南陽汝寧五府及汝州直隸則大名府之東明長垣山東則曹州府之定陶曹縣城武單縣江南則潁州府之潁上太和亳州蒙城湖北則襄陽府之襄陽光化宜城棗陽

穀城均州鄖陽府之鄖縣保康及鄖西之東境德安府隨州之北境是也

黑水

黑水卽瀘水水經注黑水亦曰瀘水卽若水出姚州徼外吐蕃界中東北至叙州宜賓縣注於江此禹貢梁州之黑水也

沱潛

按荊州亦有沱潛疏謂發源梁州而注於荊州

漢書地理志沱水在蜀郡郫縣江沱在東西入大江

卽郿江也括地志潛水一名復水今名龍門水源出  
綿谷縣東龍門山合注於嘉陵江

沔

水經注沔水一名沮水出武都沮縣東狼谷東南至  
沔縣注於漢水

臣等謹按黑水沱潛沔水皆禹貢所載梁州之水  
也梁州東據華山之南西距黑水以今輿地言之  
則陝西漢中府之鳳縣興安州及商州之維南山

陽鎮安商南秦州之兩當階州之成縣文縣湖北  
鄭陽府之房縣竹山竹溪及鄭西縣之西境四川  
則成都保寧順慶龍安嘉定雅州潼川諸府邛眉  
瀘諸州是也

臣等又按梁州之水禹貢所未載者水經注青衣  
水出青衣縣與沫水合桓水出蜀郡岷山注於南  
海延江水出犍為南廣縣東南注於酉水存水出  
犍為郫縣溫水出牂牁夜郎縣淹水出越雋遂

久縣徼外東南注於若水以今輿地言之皆在  
四川境內古梁州域也

黑水

雍州黑水杜佑通典謂不可得詳樊綽程大昌金履  
祥李元陽焦竑諸說各異然皆雍州之境按括地志  
言出伊吾南流絕三危山則當自燉煌北大磧外流  
至郡界南經白龍堆東三危山西又南經吐谷渾界  
中又南經吐蕃界中繞出河源之外而注於南海地



理今釋引水經注黑水出張掖鷄山至於燉煌此雍州之黑水也

弱水

地理今釋弱水今陝西山丹衛城西有山丹河古弱水也出衛西南窮石山正流西至合黎山與張掖河合

涇渭汭

汭漢書作易

漢書地理志涇水出安定郡涇陽縣西渭水出隴西

郡首陽縣西南汭水出扶風汧縣西北東注於涇

漆沮

寰宇記漆水自耀州同官縣來經華原縣合沮水漢書地理志沮水出北地直路縣東西注於洛

澧

漢書地理志鄠水出扶風鄠縣東南北過上林苑注

於渭

豬野

豬野澤名漢書地理志武威縣東北有休屠澤古文  
以為豬野

臣等謹按黑水弱水涇渭汭漆沮澧豬野皆禹貢  
所載雍州之水也雍州西距黑水東據河以今輿  
地言之陝西則西安延安鳳翔諸府及甘肅之平  
涼慶陽鞏昌各府皆是也

欽定續通志卷一百三

欽定四庫全書

欽定續通志卷一百四

地理畧二

五代

臣等謹案古來誌地者皆略於五代歐陽修作職方考僅標大致薛居正作郡縣志王溥作會要雖尚存十道之名然一代偶及數道一道偶及數州沿革廢置殊多遺缺其餘各書如歐陽志輿地廣

記樂史太平寰宇記馬端臨輿地考於五代亦靡  
得而詳焉信乎歐史之序曰五代亂世文字不完  
而時有廢置不可考究也若其沿唐之制改郡稱  
州而尤重藩鎮加軍額者為節度鎮州較他州為  
重故職方考特悉之凡以言其大要也今續纂五  
代地理畧其分注以職方考為主其有職方考所  
無而采之羣書者則加案語以別之職方考或有  
疑誤之處則別加案語於其下以資考訂云

唐之盛時以天下為十道而其勢未分洎其衰也置軍

節度號為方鎮兵驕則逐帥將強則叛上僖昭以來日

益割裂天下別為十一南有吳浙荆湖閩漢西有岐蜀

北有燕晉朱溫據汴遂成篡弑建號曰梁其地西至涇

渭南逾江漢北瀕河東際海所有州曰汴唐宣武軍梁為東都開封

府洛唐東都河南府雍唐上都京兆府梁改泰寧沂密

青平盧軍淄齊棣登萊徐武寧軍宿鄆天平軍曹濮宋唐屬宣武軍節

度梁徙唐昭宗光化二年朱全忠以宋州之碭山軍于此亳輝唐城單父曹州之成武表置州三年置宗

德軍 頽陳蔡許 唐忠武軍梁改匡國軍 汝鄭滑 唐義成軍梁改宣義軍 襄 唐山

道節度梁初改忠義均房鄧 唐屬山南東道節度梁分置宣化軍 隨郢泌

唐唐州昭宗天祐三年朱復安 宣威軍 申蒲 護國軍 孟 河陽全忠徙治泌陽表更名

懷晉 唐屬護國軍節度梁初 絳陝 唐保義軍梁改鎮國軍 號華 唐

國軍梁改 商同 唐匡國軍梁改忠武軍 崇 唐末李茂貞以華原縣建耀州置義勝軍梁末

帝時茂貞義子溫韜以州降梁 邠 靜難軍 寧慶 唐末李建安定梁改州為崇州軍為靜勝軍

軍節度梁為武靜軍 行廊 保大軍 坊丹延 唐屬保大軍案此據太平寰宇記 節度梁置忠

義軍 案自崇州至此凡九州職方考皆注岐字考史 梁太祖開平三年取廊坊丹延諸州乾化五年邠寧二



州俱降梁行州尋亦為梁所取是此數州  
實為梁有不得分屬之岐今刪去岐字  
夏定難銀

綏宥靈

朔方軍

鹽魏

天雄軍

博貝衛澶相

唐屬天雄軍節度梁分置昭德

軍邢

唐屬昭義軍節度昭義舊統澤潞邢銘磁五州  
唐末孟方立為節度使徙軍額於此而澤潞二

州入晉故其時有兩昭義軍梁晉之爭或入于  
梁或入于晉梁以邢州統洺磁二州為保義軍  
洺磁改

州惠鎮

唐成德軍梁改武順軍

冀深趙易祁定

義成軍

凡七十有八晉

發憤仇讐既克燕孽遂翦朱梁改晉稱唐其地東至海

南至淮漢西度秦隴北盡燕代所有州曰并

西京太原府尋改北

都洛

復為東都雍

復為西都廢永平軍

魏東京興唐府尋改鄴都

汴

復為宣武軍

兗沂

密青淄齊棣登萊徐宿鄆曹濮宋

改歸德軍

亳單

梁輝州後唐改為單

州

潁陳蔡許

復為忠武軍

汝鄭滑

復為義成軍

襄均房鄧

改為威勝軍

隨郢唐

復為唐州復安

改為安遠軍

申蒲孟懷晉

改為建雄軍

絳陝

復為義軍

號華

復為鎮國軍

商同

復為匡國軍

耀

復為崇州為耀州改順義軍

邠寧

慶衍廊坊丹延

改為彰武軍

夏銀綏宥靈鹽岐

唐末為李茂貞所據後唐

莊宗同光初內附仍為鳳翔軍案此據顧祖禹方輿紀要

隴涇

岐彰義軍原渭武秦

武軍蜀成

梁改為汶州末帝貞明初地入于蜀後唐同光中復曰成州

案此據太平寰宇記階

鳳

故屬山南西道節度蜀升為武興軍後唐廢

案此據太平寰宇記

乾

唐末李茂貞置後為威勝軍後

唐同光中改為刺史  
案此據太平寰宇記  
博貝衛澶相  
復隸天雄軍案此據太平寰宇記

邢洺磁  
復惠州為磁州以邢鎮初為北都尋罷都復為洺磁三州為安國軍成德軍按此據五代

史莊宗  
本紀  
冀深趙易祁定滄  
唐橫海軍節度梁末以張萬進歸順改順化軍後唐復為

橫海軍  
案此  
景德瀛莫幽  
盧龍軍  
涿檀薊順蔚朔  
振武

雲  
大同  
應  
故屬大同軍明  
新  
威塞  
嬀  
儒武寰  
本朔州馬邑縣梁開

平中晉王存勗於此置興唐軍後唐明  
宗天成初改置州  
案此據方輿紀要  
忻代  
雁門  
嵐石

憲麟府  
唐末於此置府谷鎮後唐莊宗以代北諸部屢為邊患乃升為府谷縣尋建州案此據輿地

考汾慈隰澤潞  
改為安  
沁遼凡一百二十有三  
案職方考莊宗

初起并代取幽滄有州三十五後又取梁魏博等十有六州合五十一州以滅梁岐王稱臣得七州同光破蜀已而復失惟得秦鳳階成四州而營平二州已陷於契丹其增置州一合為一百二十三州今考後唐以同光三年破蜀而孟知祥僭號在長興應順之間是時山南諸州尚未盡入于蜀其僅有秦鳳階成四州蓋石晉時事又考同光二年瓜沙入貢命權知歸義留後曹義金為刺史節度使長興初涼州亦來附四年又置保順軍於洮州兼領鄯州是後唐所有州殆不僅如職方考所稱而已也又職方考既稱一百二十三州而譜內統營平二州為一百二十五州蓋誤今刪去

石晉興戎契丹助虐石氏既立

遂獻燕雲一十六州於契丹合得後唐故地及取蜀

之州一增置之州一其所有州曰汴

東京開封府

洛

河南

府雍廢後唐西京魏改興唐府為廣晉府尋升充沂密

青淄齊棣登萊徐宿鄆曹故屬宣武軍濮宋亳單潁陳

鎮安管均房二州割隸鄆州蔡許汝鄭滑襄晉太祖天福七年降為防禦州所

會均房金故屬山南東道節度唐末置戎昭軍已而廢

罷鄧隨郢唐復為泌州案復安罷安申蒲孟懷晉絳

陝號華商同耀邠寧慶衍威天福四年置割靈州之方

為屬而廊坊丹延夏銀綏宥靈鹽岐隴涇原渭武秦成

階鳳乾博貝永清衛澶故屬天雄軍節度晉天福九年

軍案此據會要及輿地考

相彰德

洛邢磁鎮

改為順德軍

冀深趙易祁

定滄景德忻代嵐石憲麟府

案職方考晉置永安軍漢罷之周復考五代會要漢

高祖天福十二年升為永安軍節度隱帝乾祐三年降為團練周世宗顯德元年復舊軍額而輿地考亦云晉

高祖賂契丹以河西之地契丹欲遷河西之民實遼東人心大擾從阮因保險阮之少帝絕契丹詔從阮出師

從阮乃深入拔十餘砦漢時從阮歸命升府州為永安軍是永安軍之置實在漢初職方考疑誤并

汾慈隰澤潞

復為昭義軍

沁遼

天福三年改置昭義軍於此四年廢案此據方輿

要凡一百有九晉天福六年以劉知遠為河東節度

使北京留守自出帝立與契丹絕盟及契丹入汴徙

晉主於黃龍府知遠乃稱尊號以令四方遠近爭應

之契丹留其臣蕭翰守大梁遂北去時潞州及晉陝

皆來附知遠遣師從晉陝而東蕭翰遁去河南遂定

契丹適有內變晉之舊境悉歸於漢其所有州曰汴

東京開封府洛西京河魏改廣晉府為大雍改為永兗沂

密青淄齊棣登萊徐宿鄆曹罷咸濮宋亳單潁陳廢

安軍蔡許汝鄭滑襄復為山南東道均房金鄧隨郢唐

復泌州為唐州案復安復為安申蒲孟懷晉絳陝

號華商同耀解

隱帝乾祐元年置割河中之聞喜安邑二縣為屬而治解案此據輿地

考

邠寧慶衍威廊坊丹延夏銀綏宥靈鹽岐隴涇原

渭武乾博貝衛澶相邢洺磁鎮

復為成德軍

冀深趙易祁

定滄景德忻代嵐石憲麟府

初置永安軍尋廢

并汾慈隰澤

潞沁遼凡一百有六

案職方考云一百有六州而譜內所列乃一百十州考五代史

後蜀世家契丹滅晉漢高祖起於太原中國多故雄武軍節度使何建以秦成階三州附於蜀昶因遣孫

漢韶攻下鳳州於是悉有王衍故地是秦鳳階成四州漢初即入蜀而職方考誤以為漢有也今刪去四

州以符一百六州之數

漢乾祐三年以郭威為鄴都留守天雄



軍節度使會漢主誅僇大臣并及于威威遂舉兵趨

汴尋即帝位代漢稱周世宗奮其雄略西克階成南

收江北北莫三關其所有州曰汴

東京開封府

洛

西京河南府

雍

兗

太祖廣順二年罷泰寧軍

案此據會要

沂密青淄齊棣登萊徐宿鄆曹

彰

信濮濟廣順二年置割鄆州之鉅野鄆城兗州

宋亳

單頰陳

復為鎮安軍

蔡許汝鄭滑襄均房金鄧

武勝軍

隨郢唐

復安

罷安遠軍

申蒲孟懷晉絳陝號華

罷鎮國軍

商同

廣順二年廢匡國軍

案此據太平寰宇記

耀

罷順環廣順二年改威州為環州世

宗顯德四年降為通遠軍

邠

寧慶解鄜坊丹延夏銀綏宥靈鹽岐隴涇原渭秦成階

鳳乾魏

廢鄜都仍舊為天雄軍案此據輿地考

博貝

顯德元年廢永清軍案此據會要

衛

澶相邢洺磁鎮冀深

置靜安軍據太平寰宇記

案此

趙易祁定滄德

濱

顯德三年置割棣州之渤海蒲臺為屬而治渤海

瀛莫雄

唐屬涿易二郡顯德六年克无橋關

置治霸

顯德六年克益津關置治永清縣歸義割莫州之文安瀛州之大城為屬府復為永

慈

隰澤潞揚

唐大都督淮南節度吳改江都府南唐以天長縣為軍六合為雄州周復故

楚順

化軍節度南唐因之顯德五年廢

泗滁和光黃舒蘆

吳昭順軍節度南唐因之周改

為保壽

吳忠正軍節度南唐改曰信軍清淮軍周復為忠正軍

海泰

本唐揚州海陵縣南唐置州以

揚之興化楚之鹽城來

濠通

唐海陵之東境南唐置靜海制置院周升為靜海軍

屬案此據輿地考節度後置通州分其地置靜海海門二縣為屬而治靜海

凡一百一十有八當梁晉

時岐稱臣蜀燕繼滅閩亦為吳浙所并存者五國而後

唐同光中孟知祥以西川叛略有前蜀諸州仍號蜀周

廣順初劉崇自立於晉陽號北漢蓋自江以南潤常宣

歙鄂昇池饒信江洪撫袁吉虔筠建汀劍漳泉凡二十

一州為南唐

案職方考於漳泉二州下注留從効字蓋其時二州雖為留從効所據然已羈屬南

唐今刪去自劍以南及山南西道益漢彭蜀綿眉嘉劍梓遂

果閭普陵資榮簡邛黎雅維茂文龍熙施夔忠萬興利  
開通涪渝瀘合昌已蓬集壁渠戎梁洋凡四十六州為  
蜀自湖南北潭衡澧朗岳道永邵全辰凡十州為楚自  
浙東西杭越蘇湖溫台明處衢婺睦秀福凡十三州為  
吳越自嶺南北融郴連昭宜桂賀梧蒙嚴富柳象容邕  
端康封恩春新高竇雷化韶藤白廉欽廣橫賓潯惠鬱  
林英雄瓊崖儋萬安羅潘勤龍辨凡四十七州為南漢  
自太原以北忻代嵐石憲麟并汾沁遼凡十州為北漢

而荆歸峽三州為南平四分五裂廢置無常今第附見  
州名而已

欽定四庫全書

欽定四庫全書  
卷一百四

欽定續通志卷一百四

欽定四庫全書

欽定續通志卷一百五

地理畧三

宋

宋初有州百一十一太祖建隆四年取荆南得州府三  
平湖南得州十五監一乾德三年平蜀得州府四十六  
開寶四年平廣南得州六十八年平江南得州一十九  
軍三太宗太平興國三年陳洪進獻地得州二錢俶入

朝得州十三軍一四年平太原得州十軍一七年李繼

捧來朝

按宋史本紀李繼捧獻地係太平興國七年事地理志誤作五年今改正得州四按地

理志注云雍熙元年復以四州授繼捧自後不復領職方考陝西路有綏德軍即綏州熙寧三年收復隸延州元符二年改為軍又有銀州銀川城俱詳見本志是綏銀仍領職方所不領者是宥二州耳是時天

下既一未入職方者惟燕雲十六州至道三年分天下

為十五路仁宗天聖中析為十八神宗元豐中又析為

二十三曰京東東西京西南北河北東西永興秦鳳河

東淮南東西兩浙江南東西荆湖南北成都梓利夔福



建廣南東西嶽宗崇寧四年復置京畿路宣和四年又

置燕山府及雲中府路天下分路二十六哲宗元祐元

年并京東東西為京東路京西南北為京西路凡二十

四路曰京畿路領府一開封因周之舊為東京曰京東路領府

五濟南濟南郡興德軍節度本齊州政和六年升為府按齊州宋史誤作濟州考本路自有濟州此

當見齊州今據王存元豐九域志及各書改正應天河南郡歸德軍節度本宋州景德三年升為府襲

慶魯郡泰寧軍節度本兗州政和八年升為府興仁濟陰郡彰信軍節度本曹州崇寧元年升為府

東平東平郡天平軍節度本鄆州大觀元年州十二青升大都督府宣和元年改為東平府

北海郡鎮密高密郡按郡名據沂郡邪登東牟萊東

海軍節度密元豐九域志增入淄川徐彭城郡武濟濟

郡濰北海郡按郡名據歐淄川徐彭城郡武濟濟

單碭濰濰陽拱保慶軍節度本開封府軍二淮陽太

興國七年以徐廣濟本漢定陶縣唐為鎮隸曹州宋太

鎮據輿地曰京西路領府五襄陽襄陽郡山南東道節

廣記增入度本襄州宣和元年

升為河南洛陽郡因梁晉潁昌許昌郡忠武軍節度本

淮寧淮陽郡鎮安軍節度本順昌汝陰郡本潁州元豐

政和六年州十二鄧南陽郡武隨漢東郡崇金安康郡

理志云乾德五年改昭化軍節度改李攸宋朝事實乾德五年改昭化軍節度復為防禦是節度之建未久即

廢而史仍房房陵郡保均武當郡宣和元年郢富水唐誤載也

淮安鄭榮陽郡奉滑靈河郡太平興國孟濟源郡河陽寧軍節度初改武成軍節度

蔡汝南郡淮康軍節度按宋朝事實汝臨汝郡政和升節度係景祐二年事宋史不載

軍節度軍二光化乾德二年以襄州陰城鎮建為軍析穀城縣三鄉置乾德縣隸焉信陽

唐義陽郡本申州開寶九年降為義陽軍太平興國元年改今名曰河北東路領府三

大名魏郡慶厯二年開德澶淵郡鎮寧軍節度本河間魏郡建為北京澶州崇寧五年升為府

郡瀛海軍節度本瀛州大州十一滄景城郡橫冀信都觀二年升為府賜軍額海軍節度冀郡慶

歷八年升安博博平棣樂安莫文安雄易陽郡本唐涿  
武軍節度

和三年霸永清郡本唐幽州永清縣地後置益德平原  
賜郡名津關周置霸州宋政和三年賜郡名德郡

濱大觀二年賜恩清河郡本貝州慶清乾寧郡本唐幽  
渤海郡名恩歷八年改今名清州蘆臺軍之地

五代晉陷契丹周平三關置永安縣屬滄軍三永靜唐  
州宋大觀二年建為州政和三年賜郡名

州周降為通遠軍宋信安太平興國六年以霸州涿口  
景德元年改今名信安若建破虜軍景德二年改今

名保定太平興國六年以涿州新鎮曰河北西路領府  
建平戎軍景德元年改今名

四真定常山郡成中山博陵郡本定州太平興國初改  
德軍節度定武軍節度政和三年升為府

信德鉅鹿郡安國軍節度本慶源趙郡慶源軍節度本  
邢州宣和元年升為府慶源趙州崇寧四年賜軍

額宣和元州九相鄴郡彰德濟平川軍節度本滑州黎  
年升為府

軍政和五年升懷河內衛汲洺廣平深饒陽磁滏陽祁  
為州賜軍額

蒲陰保清苑郡本莫州清苑縣建隆初置保塞軍  
郡太平興國六年建為州政和三年賜郡名軍四

安肅本易州遂城縣太平興國六年永寧雍熙四年以  
建為靜戎軍景德元年改今名

建寧邊軍景德廣信本易州遂城縣太平興國六年順  
元年改今名建為威虜軍景德元年改今名

安本瀛州高陽關砦曰河東路領府三太原太原郡河  
淳化三年建為軍

隆德上黨郡昭義軍節度本平陽平陽郡建雄軍節度  
潞州崇寧三年升為府本晉州政和六年升

為州十四絳絳澤高平代鴈門忻定襄汾河西遼樂平  
府

憲

政和五年賜名汾源郡

嵐樓頌

石昌化

隰大寧郡

慈麟

新秦郡鎮西軍節度

府

榮河郡靖康軍節度本永安軍崇寧元年改軍額政和五年賜郡名

豐

寧豐郡慶應元年元昊攻陷州

地嘉祐七年以府州羅泊川掌地復建為州政和五年賜郡名

軍七威勝

太平興國三年于潞州銅

鞏縣亂柳石

平定太平興國二年以鎮

奇嵐

太平興國五年以嵐

州嵐谷縣

寧化

按輿地廣記太平興國四年析嵐州地置寧化縣五年于縣置軍宋史未詳

火山

本嵐州之地太平興國七年建為軍按輿地廣記以嵐州雄勇鎮建為軍宋史未詳

保德

淳化四年

析嵐州地置定羌軍景德元年改今名按嵐州馬端臨輿地考作憲州

晉寧本西界設蘆岩

元符二年

曰永興路領府四京兆

京兆郡永河中河東建為軍

國軍節度延安延安郡彭武軍節度本府慶陽安化郡慶陽軍節度本慶州政

和七年升節度宣州十五解陝改保平軍節度初商洛

和七年改為府

大軍節度丹威寧郡按郡名據坊中部銀銀川郡五代以

宋元豐中收復崇寧四年建環舊降為通遠軍淳邠新

為銀州五年廢為銀川城

郡靜難寧彭原郡宣和元年醴舊乾州政和軍四清平

本鳳翔府盤屋縣清平保安按興地廣記太平興國二鎮大觀元年升為軍

史未

綏德唐綏州宋熙寧三年收復廢為定邊元符二

詳城隸延州元符二年改為軍

欽定四庫全書

卷一百五

邊城後改為軍曰秦鳳路領府一鳳翔扶風郡鳳州十九秦天水

郡雄武隴汧陽成同谷鳳郡河池階西戎後復其地改置

馬渭隴西郡政和七年涇安定郡太平興國元原平涼

會元符二年進築西安元符二年以南熙臨洮郡鎮洮軍節度

收復改名河安鄉郡熙寧鞏熙寧五年以秦軍古渭砦

州岷和政郡熙寧蘭金城郡元豐洮唐末陷吐蕃號臨

收復仍舊廓崇寧三年收復樂舊遼川城元符二年收復建湟

為洮州年收復州大觀三年加嚮德軍節度宣

和元年改西寧西平郡賓德軍節度舊青城元符二

為樂州年建鄯州崇寧三年改名并賜郡名軍



額軍五德順

慶應三年即渭州隴干城建為軍

鎮戎

本原州高平縣地至道三年建為軍

按地理志脫平字今據宋朝事實增入

懷德

本平夏城大觀二年建為軍初名威德又改今名

震

武

政和六年進築古骨龍城賜名震武城未幾改為軍

積石

本溪哥城大觀三年建為軍

曰兩

浙路領府八臨安

餘杭郡淳化五年改寧海軍節度本杭州建炎三年升為府

紹興

會稽郡鎮東軍節度本

平江

吳郡太平興國三年改平江軍節度本蘇州此和三

越州紹興元年升為府

江

吳郡太平興國三年改鎮江軍節度本

慶元

奉化郡建隆元年

為府

鎮江

丹陽郡開寶八年改鎮江軍節度本

建德

年升奉國軍節度本明

瑞安

永嘉郡本温州咸淳元年升為府

州紹興五年升為府

建德

郡宣和元年升建德軍節度三年改遂安軍

嘉興

節度本睦州後改嚴州咸淳元年升為府

政和七年

欽定四庫全書

卷一百五

賜名嘉禾郡本秀州慶元元年升  
為府嘉定元年升嘉興軍節度  
州六湖  
元吳興郡景祐  
元年升昭慶

軍節度  
婺東陽郡淳化元年  
常陵台臨海處  
郡緡雲衢信  
安

郡軍一江陰按兩浙自熙寧十年合為一路南渡後復分臨安平江鎮江嘉興四府湖常嚴三州

江陰一軍為西路餘各府州為東路今仍依地理志合為一路曰淮南東路領州十一

揚南節度廣陵郡淮 亳年建集慶軍節度 宿符離郡開寶元年

楚山陽郡海東海郡泰海陵郡泗臨淮郡滁永陽郡真儀真郡  
三年為建安

軍大中祥符六年升通政和七年賜  
州政和七年賜郡名靜海郡名安東  
本遼水軍景定初升州

軍四高郵開寶四年以揚州高郵縣為軍招信本泗州盱眙三年升軍淮安本泗州

安  
泗本

州五河口咸清河咸淳九年置  
曰淮南西路領府二壽春壽

州忠正軍節度本壽安慶同安郡德慶軍節度本舒州  
州政和六年升為府政和五年賜軍額慶元元年

升為州六廬廬江郡保信軍節度按  
廬江郡保信軍節度按

濠鍾離光弋陽郡宣和初黃齊安軍三六安政和八年  
郡光弋陽郡宣和初黃齊安軍三六安政和八年

無為太平興國三年以廬州懷遠寶祐五年置  
太平興國三年以廬州懷遠寶祐五年置

領府二江寧建康軍節度開寶八年復為昇州天禧二  
年升為府加軍額按地理志復為昇州

下衍節度二字今寧國宣城郡寧國軍節度本  
據宋朝事實刪去宣城郡寧國軍節度本

新安郡本歙州宣池陽饒都陽信上饒太平開寶八  
和三年改今名池陽饒都陽信上饒太平開寶八

平軍太平興國二年升為州按顧祖禹方輿紀要云南唐置新和州尋改雄遠軍開寶中改南平軍宋史未

詳軍二南康

太平興國七年以江州星子縣建為軍

廣德

太平興國四年以宣州廣德縣

建為

曰江南西路領府一隆興

豫章郡鎮南軍節度本洪州隆興三年升為府

州六江

潯陽郡建炎元年升定江軍節度

贛

南康郡昭信軍節度本虔州紹興二十二年改今名

吉

廬陵郡

袁

宜春郡撫臨川

瑞

紹興十三年賜高安郡名本筠州寶慶元年改今名

四興國

太平興國二年以鄂州永興縣置永興軍三年改今名

南安

淳化元年以虔州大庾縣

建為

臨江

淳化三年以筠州之清江建為軍

建昌

舊建武軍太平興國四年改

曰荆

湖北路領府三江陵

江陵郡荆南節度本荆州建炎四年置荆南府淳熙中改今名

安

安陸郡安遠軍節度本安州宣和元年升為府按方輿紀要云熙寧初升為德安府以舊為潛邸故也

與宋

史異

常德

武陵郡常德軍節度本州九鄂江夏郡武復

昌軍節度

復

景陵

澧陽

峽夷陵

岳

巴陵郡宣和元年

歸

巴東辰盧

郡沅

潭陽郡本懿州靖

本誠州熙寧九年收復崇寧二年改今名

軍三荆門

按曾鞏隆平集開寶五年以荆門鎮為軍宋史未詳

漢陽壽昌

本鄂州武昌縣嘉定十五年升為軍

曰荆湖南路領府一寶慶

邵陽郡寶慶軍節度本邵州寶慶元年升為府淳祐六年

加軍

州六潭

長沙郡武衡

衡陽道

江華

永

零陵郴桂陽

全軍三茶陵

本衡州茶陵縣紹興九年升為軍

桂陽

本桂陽監紹興武

岡本邠州武岡縣崇寧五年升為軍 曰福建路領府一建寧建寧郡端拱元年升

建寧軍節度本建州紹興二十三年升為府州五福長樂郡威武軍節度泉清源郡太平興國初

改平海軍節度南劍興國四年加南字漳漳浦郡汀臨汀軍二

邠武太平興國五年以建州邠武縣建為軍興化太平興國四年以泉州游洋百丈二鎮地置太

平軍尋改今名 曰成都府路領府三成都蜀郡劍南西川節度崇慶唐安郡崇

慶軍節度本蜀州紹興十年加軍額淳熙四年升府嘉定捷為郡嘉慶軍節度本嘉州慶元二年升府開

禧元年通義加軍額州十眉彭濠陽緜巴西郡漢德陽工臨簡

陽安黎漢源郡雅廬山郡茂通化威維川郡本維州景軍二

永康

唐鎮靜軍宋太平興國三年改今名

石泉

本綿州石泉縣政和七年建為軍

監一仙

井

本陵州熙寧五年為陵井監宣和四年改今名

曰潼川府路領府三潼川

梓

郡劍南東川節度本梓州重和元年升為府

遂寧

遂寧郡武信軍節度本遂州政和五年升為府

順

慶

南充郡本果州寶慶三年升為府

州

資

資陽郡

普

安岳郡

昌

昌元叙南

郡本戎州政和四年改今名

瀘

瀘州郡宣和中

合

巴川郡

榮

和義渠山

郡軍三長寧

本羈縻州政和中建為軍

懷安

乾德五年以簡州金水縣建為軍

寧西

開寶二年建廣安軍咸淳中改今名

監一富順

本瀘州富義縣乾德四年升為監太平興國初改今

名曰利州路領府三興元

漢中郡山南道節度

隆慶

普安郡普安軍節度

本劍州隆興二年賜軍同慶同谷郡本成州寶州十二

額紹熙元年升為府同慶元年升為府利益川郡景祐四年洋洋川郡景祐四年閬閬中郡乾

改寧武軍節度改武康軍節度安德軍巴清化文陰平順政郡本興州開蓬咸安龍

節度江油郡政和五年改為金安康郡昭階武都西和和政

改州紹興元年復舊岷州紹興十年鳳河池軍二大安本三泉縣至道天水興

七年改今名初秦州入于金分置南北天水縣嘉定元年升為軍曰夔州路領府三紹慶黔中

泰軍節度本黔州咸淳南賓郡本忠州咸重慶巴郡本渝州崇

紹定元年升為府寧元年改恭州九夔雲安郡寧施清江萬南浦開盛山

州後升為府江軍節度萬南浦開盛山



達通川郡本通州乾德三年改今名涪涪陵珍大觀二年建思政和八年建播樂源

郡大觀二年建軍三雲安開寶六年以夔州雲安縣建為軍梁山高梁郡開寶二年以萬州

王氏屯田南平熙寧八年收西蕃部以恭州南川縣銅佛壩地建為軍監一大寧

開寶六年以夔大昌縣鹽泉所建為軍曰廣南東路領府三英德涪陽郡本英州

宣和二年賜郡名肇慶高要郡肇慶軍節度本端州元慶元元年升為府符三年升與慶軍節度重和元

年升為肇慶德慶晉康郡永慶軍節度本康州紹府并改軍額興十四年升為府并賜軍額州十

二廣南海郡清海軍節度韶始興郡循海豐郡潮潮陽郡連連山郡梅義安郡

潮州程鄉縣南漢置敬州開南雄保昌郡本雄州開寶四年改宣和二年賜郡名四年加南字宣和二

年賜賀臨賀封臨封新南恩恩平郡本恩州慶惠

宣和二名賀臨賀封臨封新南恩恩平郡本恩州慶惠

州為惠州輿地考亦云以犯仁宗御名故改宋史未詳

曰廣南西路領府二靜江始安郡靜江軍節度本慶遠

龍水即遠慶軍節度本宜州宣和州三十五容普寧郡

元年賜軍額咸淳元年升為府

節邕永寧郡建融融水郡大觀三年象昭平樂梧蒼

度武軍節度融融水郡大觀三年象昭平樂梧蒼

郡藤感義龔臨江潯潯江柳龍城貴懷澤賓安城橫寧

郡化陵水即本縣州太平高涼雷海原欽寧越白南

郡鬱林鬱林廉合浦瓊瓊山郡政和元年平懷遠郡崇

王口砦建懷遠軍尋改從崇寧四年于中古州置格允  
為州宣和二年賜郡名州五年改今名政和初廢

崇寧四年于安口廢庭大觀元年以宜州河孚大觀元年  
置州政和初廢池縣置州四年廢以地州建

隆縣置州宣溪大觀元年以宜州思恩鎮大觀元年于  
和三年廢縣帶溪砦置州四年廢瓊州黎母山

心置州賜靜海軍地文蘭那寧五年納土觀大觀四  
額政和元年廢寧五年納土觀大觀四

峯砦置州紹隆兌二州俱政和四年軍四南寧本儋州  
興四年觀置宣和三年並廢熙寧六

年廢為昌化軍萬安萬安即舊萬安州吉陽本崖州熙  
紹興中改今名熙寧七年廢為軍寧六年廢

為朱崖軍紹延德大觀元年置軍曰燕山府路領府一  
興中改今名政和元年廢

燕山廣陽郡永清軍節度本唐幽州契丹為南京又改  
號燕京宋宣和四年改為燕山府并改郡名軍額

州九涿

行軍節度

檀

橫山郡鎮

平

漁陽郡撫

易

遂武

營

平盧

順興

廣川

景

濛州郡以上八州五代時皆陷

和四年復賜郡名

軍

節

大

同

額經

本薊州玉田縣宣

曰雲中府

路領府一雲中

軍

節

大

同

度本雲州

和五年收復改為雲中府

宣

州八武應朔蔚奉聖

本新

州

和

年

收

復

丹改為

歸化

本毅州五代唐改為武

州

和

年

收

復

大

約

自

建隆初

訖於治平之末

州郡沿革

無

符

封

域

之

表

斥

大

土

宇

廩

有

寧

歲

凡

所

建

州

軍

關

城

砦

符

封

域

之

表

斥

大

土

宇

廩

有

寧

歲

凡

所

建

州

軍

關

城

砦

符

封

域

之

表

斥

大

土

宇

廩

有

寧

堡紛然莫可勝紀高宗南渡中原陝右盡入于金東畫  
長淮西割商秦之半以散關為界所存者兩浙兩淮江  
東西湖南北西蜀福建廣東廣西十五路而已今據宋  
史所定首京畿終燕雲悉著于篇而宋之疆宇大畧可  
見矣

欽定續通志卷一百五